

UREDBU
O FINANSIRANJU PROGRAMA ZA OTVARANJE RADNIH MJESTA ZA
BRANIOCE, RATNE VOJNE INVALIDE, PORODICE ŠEHIDA I PORODICE
POGINULIH, UMRLIH I NESTALIH BRANILACA
("Službene novine Kantona Sarajevo", broj 31/06)

Član 1.

(Osnovna odredba)

Uredbom o finansiranju programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca (u daljem tekstu: uredba) utvrđuju se korisnici prava, način i uvjeti finansiranja programa za otvaranje radnih mjesta kroz pokretanje ili proširenje djelatnosti, tijela i nadležnost za realizaciju programa, sredstva za finansiranje programa i druga pitanja od značaja za ostvarivanje ovog prava.

Član 2.

(Korisnici prava)

Korisnici prava na finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca (u daljem tekstu: finansiranje programa) su lica iz člana 1. i 2. Zakona o dopunskim pravima boraca-branilaca Bosne i Hercegovine ("Službene novine Kantona Sarajevo", br.2/02, 28/03, 15/05, 22/05 i 17/06) i članovi njihovog porodičnog domaćinstva.

Član 3.

(Sredstva za finansiranje programa)

(1) Kanton Sarajevo (u daljem tekstu: Kanton) obezbjeđuje finansiranje programa u skladu sa budžetskim sredstvima i sredstvima iz povrata ranije plasiranih pozajmica za finansiranje programa (revolving sredstva). Plasman revolving sredstava operativan je po isteku svakog kvartala u okviru budžetske godine.

(2) Sredstva iz prethodnog stava odobravaju se u vidu pozajmica privrednim društvima i samostalnim radnjama (u daljem tekstu: firme) u svrhu pokretanja i proširenja djelatnosti a u cilju otvaranja radnih mjesta za lica iz člana 2. ove uredbе.

Član 4.

(Poslovna banka za plasiranje pozajmica za finansiranje programa)

(1) Ministarstvo za poslove plasiranja i otplate pozajmica za finansiranje programa vrši odabir poslovne banke, a u skladu sa propisima iz oblasti javnih nabavki roba i usluga.

Uzajamni odnos između Ministarstva i poslovne banke reguliše se posebnim ugovorom o komisionim poslovima, po izvršenom odabiru poslovne banke.

Po odobravanju pozajmice za finansiranje programa Kanton putem Ministarstva za boračka pitanja Kantona Sarajevo (u daljem tekstu: Ministarstvo) doznačuje sredstva poslovnoj banci, koja ih prema odluci o odobravanju pozajmice plasira korisniku pozajmice za finansiranje programa.

Član 5.

(Podnošenje zahtjeva za odobravanje pozajmice za finansiranje programa)

- (1) Podnosioci zahtjeva za odobravanje pozajmica za finansiranje programa mogu biti firme koje u skladu sa svojim biznis planom planiraju otvaranje radnih mjesta za lica iz člana 2. ove uredbe.
- (2) Firme podnose zahtjev za odobravanje pozajmice za finansiranje programa sa potrebnom dokumentacijom Ministarstvu.
- (3) Potrebna dokumentacija koja se prilaže uz zahtjev je:
 - a) rješenje o registraciji društva ili rješenje o obavljanju samostalne djelatnosti;
 - b) biznis plan;
 - c) dokaz o statusu lica iz člana 2. ove uredbe i dokaz o nezaposlenosti lica, za koje se otvara radno mjesto i po osnovu kojeg se traži pozajmica za finansiranje programa;
 - d) bilans stanja i uspjeha za posljednje 3 godine, odnosno za period od registracije društva ili pokretanja samostalne djelatnosti;
 - e) druga dokazna dokumentacija po traženju Ministarstva.
- (4) Zahtjev sa potrebnom dokumentacijom, ukoliko su zadovoljeni potrebni uvjeti, Ministarstvo prosljeđuje poslovnoj banci koja daje mišljenje o opravdanosti istog i Kreditnom odboru za dodjelu pozajmica za finansiranje programa (u daljem tekstu: Kreditni odbor) dostavlja prijedlog odluke za rješavanje po zahtjevu.

Član 6.

(Pozajmice za finansiranje programa)

- (1) Pozajmice za finansiranje programa odobravaju se u visini do 20.000 KM po svakom novootvorenom radnom mjestu, a po ovom osnovu najveći iznos pozajmice za finansiranje pojedinačnog programa može biti do 200.000 KM.
- (2) Pozajmice za finansiranje programa odobravaju se na period otplate do 96 mjeseci uključujući grejs (grace) period od 12 mjeseci, sa kamatnom stopom od 3% na godišnjem nivou.
- (3) Omjer plasmana sredstava iz pozajmica za finansiranje programa je najmanje 50% u stalna sredstva, a najviše 50% u obrtna sredstva.
- (4) Kod odobranja pozajmice za finansiranje programa prednost prilikom rješavanja imaju zahtjevi za finansiranje proizvodne, proizvodno-prerađivačke, zanatsko-uslužne i izdavačke djelatnosti.
- (5) Korisnici koji namjenski iskoriste pozajmicu za finansiranje programa i u potpunosti i na vrijeme izmire obavezu vraćanja iste oslobađaju se plaćanja posljednje rate i imaju prednost kod odobranja nove pozajmice za finansiranje programa.

Član 7.

(Instrumenti obezbjeđenja)

Instrumenti obezbjeđenja povrata pozajmice za finansiranje programa su dva jemca za iznos do 20.000 KM, a za iznose preko 20.000 KM založno pravo na nepokretnosti (hipoteka) u odnosu 1:2. U zavisnosti od kreditne sposobnosti jemaca poslovna banka može tražiti i dodatna obezbjeđenja u skladu sa svojim propisima.

Član 8.

(Kreditni odbor)

(1) Kreditni odbor u sastavu od 5 članova imenuje Vlada Kantona, i to 3 člana iz Ministarstva za boračka pitanja Kantona, Ministarstva finansija Kantona i poslovne banke a 2 člana iz reda stručnih kadrova Univerziteta u Sarajevu.

(2) Zadaci Kreditnog odbora su:

- a) rješavanje po zahtjevima za dodjelu pozajmica za finansiranje programa;
- b) rješavanje po zahtjevima za reprogramiranje pozajmica za finansiranje programa u korištenju;
- c) rješavanje po zahtjevima za oslobađanje plaćanja posljednje rate pod uvjetima iz stava (5.) člana 6.;
- d) edukacija potencijalnih korisnika ovog prava kroz održavanje seminara o pokretanju, obavljanju i vođenju malog biznisa, te davanje prijedloga, mišljenja i sugestija za oporavak firmi koje usljed krize poslovanja nisu u stanju vršiti povrat pozajmice;
- e) analiza stanja odobravanja i otplate realizovanih pozajmica za finansiranje projekata i davanje prijedloga za poboljšanje naplate;
- f) angažovanje operativnog tima za kontrolu namjenskog korištenja pozajmica putem obilaska, te nalaže snimanje stanja poslovanja u firmama koje kasne sa otplatom;
- g) davanje prijedloga Vladi Kantona za otpis pozajmica čiji povrat je nemoguće realizovati (ostvariti);
- h) godišnje izvještavanje o radu;
- i) i drugi poslovi od značaja za odobravanje, realizaciju i otplatu pozajmica za finansiranje programa.

Član 9.

(Prestanak primjene ranijih propisa)

Ovom uredbom stavlja se van snage Uredba o finansiranju programa za pokretanje ili proširenje proizvodno-uslužnih djelatnosti koje obavljaju demobilisani pripadnici Oružanih snaga BiH koji imaju potraživanja po osnovu neisplaćenih plaća pripadnika Oružanih snaga BiH ("Službene novine Kantona Sarajevo", br.4/97, 1/99, 4/00 i 26/01) i Uputstvo o načinu odobravanja i korištenja pozajmica demobilisanim borcima, vojnim invalidima i članovima porodica poginulih boraca ("Službene novine Kantona Sarajevo", broj: 29/01).

Član 10.

(Obaveze iz ugovora zaključenih po osnovu ranijih propisa)

Sve obaveze iz ugovora zaključenih po osnovu propisa iz člana 10. ove uredbe važe do njihovog ispunjenja prema odredbama ugovora i opštim propisima koji uređuju obligacione odnose.

Član 11.

(Stupanje na snagu)

Ova uredba stupa na snagu danom objavljivanja u "Službenim novinama Kantona Sarajevo".